

Sorprendi cu declaracion di Presidente Banco Central Corsow

Minister de Meza ta desmenti cu e kier dolarisacion pa Aruba tambe



► **Minister de Meza**

ORANJESTAD
Minister di Finanza, sr Mike de Meza, ayera mainta a reaciona riba un publicacion di BON DIA Aruba, relaciona cu presunto dolarisacion pa Aruba tambe.

E punto di consternacion di e mandatario ta pa e hecho cu e publicacion di BON DIA Aruba ta muestra cu su persona lo a haci un declaracion riba e posibilidad aki, esta cu Aruba lo por sigui e rumbo di otro islanan y converti dollar den e moneda nacional.

Den forma energico Minister de Meza a muestra cu el a keda sumamente sorprendi pa e

publicacion ya cu te cu ayera, nunca el a topa cu sr Emsley Tromp, Presidente di Banco di Corsow, y nunca e tabatin contacto cu e persona aki. Pues den ningun forma su persona por a haci e declaracion aki na sr Tromp, pa cual e ta sumamente preocupa cu tal insinuacion a bin dilanti.

“Nunca mi no a sinta combersa cu sr Tromp di Banco Central di Corsow” de Meza a sigura na e matutino aki. E ta muestra cu mientras cu personalmente e no conoce, cuaklier dia nan lo por sinta hunto pa atende un ke otro riba e tereno di finanza. E presidente di Banco Central di e dos islanan menciona, cu Aruba su Minister di Finanza lo a muestra inclinacion pa atende e asunto di dolarisacion eventualmente pa Aruba. Un declaracion cu a causa disgusto serca tanto e actual minister di Finanza Mike de Meza como esun anterior Nilo Swaen. Esaki pasobra awor ta resulta cu ambos ta declara cu nan no a haci cierto declaracion y cu nan ta distancia nan mes di esaki. Tanto de Meza como e ex Minister Swaen ayera a muestra e matutino aki cu nan

no a haci dicho declaracion.

Den caso di Minister de Meza, el a bai asina lew di manda carta pa tanto Bon Dia Aruba y tambe pa Minister di Finanza di Corsow pidiendo pa clarificacion riba e declaracionnan aki. Esaki pasobra e kier a tende di e matutino kico e version ta y un aclaracion, y pa e Minister pasobra Presidente di Banco Central di Corsow ta cai bou di supervision di e minister di Finanza correspondiente.

CONFUSION

Loke cu tambe de Meza ta muestra cu e no tabata contento ta cu no a menciona su nomber siendo cu e corant a asumi cu lo ta su persona. Pero di otro banda, e ta muestra cu e “tin comprension pa Bondia den esaki y cu nan (BONDIA: red) a bai “er van uit” cu lo esaki ta relata na e minister di finanzas actual”. Ademas de Meza ta sigui bisa: “Mi por imagina mi mes esei. Cu ken cu lesa un articulo na 10 di februari 2011, ta referi na e minister actual”. Como tal e ta compronde e confusion erroneo cu a wordo crea. E mandatario a sigui muestra cu e kier ta hopi cla

den esaki, esta cu nunca el a papia cu Tromp riba e topico aki. E hecho cu un declaracion asina di un Presidente di un Banco Central manera esun di Corsow y St Maarten ta duna algo asina mas peso ainda. Como tal si ta berdad cu e presidente a bisa esei, de Meza lo a tume mas na malo. “Por verwacht un Presidente no ta bai specula!” de Meza ta sigui bisa.

Den e asunto aki ayera, e mandatario a manda un carta pa e matutino pidiendo un aclaracion, y mes momento a manda uno tambe pa Minister di Finanza di Corsow pa asina haya un aclaracion riba e asunto aki y pa mira kico a realmente sosode den e caso aki. Ora cu a puntra e mandatario den ki forma e kier e aclaracion di Corsow, a muestra cu esaki mester bin den un forma di carta for di tanto minister di

Finanza di Corsow como e presidente di Banco Central di Corsow.

FLORIN

Den e asunto di un eventual cambio di florin di Aruba pa dollar, de Meza a muestra cu gobierno di Aruba nunca a trece e topico aki den discusion di studia y evalua. “Aruba no tin ningun intencion di bai den e direccion di dolarisacion.

Nos ta orguyoso di loke nos tin” e mandatario a sigui bisa.

Pa bai asina fundamentalmente kico ta haci cu un maneho monetario di un pais, ta existi un estudio pa wak kico esaki ta nifica pa nos economia y tin cu bira un discusion fundamental. Algo

cu aworaki no tin.

Pa e ultimo 25 añanan Aruba tur gobierno cu a sinta, no a cuestiona esaki. “Y si sr Tromp y Corsow kier atende esaki, ta nan pleno derecho y nan libertad” de Meza a finalisa bisando. “No tin ningun discusion riba esaki”.

Pues den ningun forma su persona por a haci e declaracion aki na sr Tromp, pa cual e ta sumamente preocupa cu tal insinuacion a bin dilanti.